

四明叢書

張宗祥



而陽生極則必退必然之理○易大壯卦上六羝羊
觸藩不能退不能遂無攸利象曰不能退不能遂不
詳也謂人終處大壯之極不能詳審謹重克己就義
而退又不能奮力必進猶羝牝之羊愚狼觸其藩籬
不能進退悔悶于懷乃不知進退之理也

天人一機進退一理當退不退災害並至祖帳東都二
疏可喜兔死狗烹何嗟及矣噫可不忍歎

天天時也人人事也機樞機發端也故文中子問易
篇曰稽之於天合之於人有定於此而應於彼○宋

史有云天人一理○孟子曰孔子進以禮退以義○
大學曰彼爲善之小人使爲國家災害並至○西漢
疏廣字仲翁東海人地節三年爲太子太傅兄子疏
受爲太子少傅在位五歲廣謂受曰吾聞知足不辱
知止不殆功成身退天之道也今宦成名立如此不
去懼有後悔卽日俱移病上疏乞骸骨上皆許之加
賜黃金二十斤皇太子賜以五十斤公卿故人設祖
道供帳東都門外送者車數百輛道路觀者皆曰賢
哉二大夫故胡氏曰易曰君子見機而作疏廣有焉

見本傳○西漢韓信淮陰人蕭何薦於高帝拜爲大將平定天下功居爲最目爲三傑封齊王後有人上書言信反上命縛信載之後車信曰果若人言狡兔死走狗烹飛鳥盡良弓藏敵國破謀臣亡今天下已定臣固當烹遂械繫以歸赦爲淮陰侯後十年縛信斬之夷三族見本傳當退不退災害並至此不然乎備詳辱忍冤死犬烹之言范蠡遺大夫種書內之辭也又見三略

挫折之忍第七十八

不受觸者怒不顧人不受抑者忿不顧身一毫之挫若撻于市髮上衝冠豈非壯士

觸抵犯也抑屈塞也謂不能受人抵觸屈抑者奮怒豈顧他人與自己者哉如灌夫酹酒罵坐曰今日斬頭何知程李之類程李二將軍名○魯論子曰一朝之忿忘其身以及其親豈不謂之忿不顧身而何○孟子曰北宮黝之養勇也思以一毫挫於人若撻之於市朝不受於褐寬博亦不受於萬乘之君無嚴諸侯惡聲至必反之謂言黝不能忍一毫之小辱於人

君小有挫辱於人如受撻打於市朝之甚辱也雖諸
侯之尊亦無嚴畏其或惡罵之聲來則必還報之如
此○戰國策秦昭王請以十五城易趙所得和氏璧
趙使藺相如奉璧往既至秦無意償城相如怒髮指
冠卻立柱下曰臣頭與璧俱碎遣從者懷璧間行先
歸相如待命於秦昭王賢而歸之

不以害人則必自害不如忍耐徐觀勝敗名譽自屈辱
中彰德量自隱忍中大黥布負氣擬爲漢將待以踞洗
則幾欲自殺優以供帳則大喜過望功名未見其終當

目已窺其量噫可不忍歟

呂氏童蒙訓曰事有不可當詳處之必無不中若先
暴怒只能自害豈能害人○名譽自屈辱中彰如釋
之之結襪子房之進履之類是也又太史斷伍子胥
方窘於江上道乞食故隱忍中就功名非烈丈夫孰
能致此哉○楚奇論曰能詘於一人之下而信於萬
乘之上者湯武是也而高祖隱忍從之卒以巴蜀之
眾還取三秦以成漢家四百年之社稷此則能勇而
能怯者也○西漢黥布楚將九江王也從謁者隨何

說歸漢既至漢王方踞牀洗足召布入見布大怒悔
來欲自殺及出就舍張御飲食從官皆如漢王居布
又大喜過望過於己所望也見本傳謂言且未見其
人後日功名如何而其心之器量於斯先已知之此
蓋不能忍於折挫者也布後反果被誅滅

不遇之忍第七十九

子虛一賦相如遽顯闕下一書頓榮主偃

西漢司馬相如字長卿蜀郡成都人未得志與妻卓
文君賣酒臨邛文君當壚相如著犢鼻褌滌器於市

嘗著子虛賦武帝讀而善之曰朕獨不得與此人同時哉時有楊得意爲狗監侍上得意曰臣邑人司馬相如爲此上驚召問對曰子虛虛言也未足觀請爲天子賦遊獵之賦上給筆札相如乃託人問答先以天子諸侯苑囿之廣大卒歸之於節儉因以風諫賦奏天子卽以相如爲中郎見本傳○西漢主父偃齊國臨菑人初學從橫術晚學易春秋於齊諸儒相與排擯不容於齊家貧假貸無所得北遊燕趙皆莫能厚遇武帝元朔元年乃西入關上書闕下朝奏暮召

入見上曰何相見之晚也乃拜爲郎中所言九事其
八事律令一事諫伐匈奴備見史傳文多不備見本
傳及元朔元年鑑

王生布衣教龔遂而曳組漢庭馬周白身代常何而垂
紳唐殿

西漢王生宣帝時爲渤海太守龔遂議曹會上徵遂
還生隨遂至京師會遂引入宮生從後呼曰明府且
止願有所白遂還問其故生曰天子卽問君何以治
渤海君不可有所陳對宜曰皆聖主之德非小臣之

力遂受其言既至上果問以治狀遂對如王生言天子說其有讓笑曰安得長者之言遂對曰臣非知此臣議曹王生教戒臣也上悅以王生爲水衡丞見龔遂傳○唐馬周字賓主在平人客遊長安舍於中郎常何家會以旱求直言常何武人不學馬周代爲之陳便宜二十餘條上怪問之何對曰此臣家客馬周爲臣具草上卽召見與語甚悅除監察御史以何知人賜絹三百疋代代常何草稿也後除中書令見本傳并貞觀五年鑑

人生未遇如求穀於石田及其當遇如取果於家園豈非得失有命富貴在天

夫穀生於沃土不生於石田謂人未遇之時如求穀於石田豈能得之及其時命濟遇猶家園取果隨求隨得○說苑正諫篇伍子胥諫吳王曰今信其遊辭僞詐而貪齊臂猶石田無所用之○魯論子夏曰死生有命富貴在天

卞和之三獻不售顏驥之三朝不遇何賈誼之抑鬱竟自終於鵬賦噫可不忍歎

楚野人卞和得玉璞於荆山奉獻懷王王使玉人相之曰石也一說使樂正子占之王以爲和詐刖其左足懷王死子平王卽位和又獻之王復使玉人相之又曰石也刖其右足平王死子荆王卽位和抱璞哭於荆三日夜泣盡繼之以血王聞之使人問曰天下刖者多奚哭之悲和曰吾非悲刖也夫以寶玉而題曰石貞士名之曰詐吾是以悲王使玉人琢其璞果得美玉焉乃封和爲陵陽侯和辭不就而去遂命曰和氏璧爲世所寶出韓非子新序作厲王武王共王

玉人作玉尹餘皆同售者賣物去手也○西漢顏駟
文帝時爲郎龐眉皓髮武帝輦過郎署問曰何時爲
郎何其老也駟曰文帝時爲郎帝曰何久不遇駟曰
文帝好文臣好武景帝好美臣貌醜陛下好少臣已
老是以三世不遇上擢會稽都尉見本傳郎署蘇林
曰郎署上林中直衛之署也○漢賈誼洛陽人有才
年少文帝卽位河南守吳公薦之於朝召爲博士時
年二十餘上欲議爲公卿大臣絳灌等多短之出爲
長沙王太傅又遷梁王太傅抑鬱不自得適有鵬鳥

飛入誼舍止坐隅誼以爲不祥長沙地又卑溼恐壽
不長乃託鳥以爲賦推原死生之理以自廣也其辭
有曰萬物變化固無休息福兮禍所伏禍兮福所倚
憂喜聚門吉凶同域天下不可與慮道不可與謀遲
速有命鳥識其時文多不備見本傳及楚辭

才技之忍第八十

露才揚己器卑識乏盆括有才終以見殺

孟子盆成括仕於齊孟子曰死矣盆成括盆成括見
殺門人問曰夫子何以知其將見殺曰其爲人小有

才未聞君子之大道也則足以殺其軀而已矣謂盆
成括雖有小小之才未有君子之大道乃恃才妄作
適足以禍而殺身詳註成括果見殺於齊國
學有餘者雖盈若虧內不足者急於人知

魯論曾子曰有若無實若虛又如老子謂孔子曰良
賈深藏若虛君子盛德容貌若愚也○韓文公知名
箴曰內不足者急於人知今日告汝知名之法勿病
無聞病其曄曄

不扣不鳴者黃鍾大呂鶯鶯聒耳者陶盆瓦釜

莊子天地篇金石有聲不考不鳴○孔叢子曰不撞
不發如大鍾然天下之深人也○老子曰大器晚成
大音希聲○賈誼賦曰黃鍾棄毀瓦釜雷鳴

韞藏待價者千金不售叫街市巷者一錢可買大辨若
訥大巧若拙遼豕貽羞黔驢易蹶噫可不忍歟

售音壽
賣物去

手銜音眩自矜
也又自銜鬻也

魯論子貢曰有美玉於斯韞匱而藏諸求善價而沽
諸子曰沽之哉沽之哉我待價者也註韞藏也朱子
引范氏之言曰君子未嘗不欲仕也又惡不由其道